

Na osnovu člana 13. stav 2. alineja 12. Zakona o principima lokalne samouprave („Službene novine Federacije BiH“, broj: 49/06. i 51/09.), člana 25. stav 1. alineja 12. Statuta Grada Tuzla („Službeni glasnik Grada Tuzla“, broj: 6/21.) i člana 27. stav 4. Odluke o javnim priznanjima Tuzle („Službeni glasnik Općine Tuzla“, broj: 10/07., 5/08. i 6/09. i „Službeni glasnik Grada Tuzla“, broj: 12/18.), na prijedlog Komisije za odlikovanja i priznanja, Gradsko vijeće Grada Tuzla, na sjednici održanoj 26. 10. 2023. godine, donosi

ODLUKU
o dodjeli javnih priznanja u 2023. godini

Član 1.

Radi odavanja priznanja za postignuti doprinos i postignute rezultate u radu, afirmaciji i zaštiti ljudskih prava i sloboda, tolerancije i demokratije, zaštite na radu i zaštite okoline, kao i za doprinos u odbrani Tuzle i Bosne Hercegovine, u spašavanju ljudi i imovine, unapređivanju uslova života u Tuzli, afirmaciji i razvoju lokalne samouprave i mjesnih zajednica, kao i unapređenju socijalne i dječije zaštite, a u povodu obilježavanja značajnih datuma iz historije Tuzle, dodjeljuju se sljedeća javna priznanja Tuzle:

a) Priznanje Povelja Grada Tuzle – pravnim licima u povodu obilježavanja 25. novembra – Dana državnosti Bosne i Hercegovine dodjeljuje se Fondaciji tuzlanske zajednice;

b) Priznanje Počasni građanin Tuzle u povodu obilježavanja 25. novembra – Dana državnosti Bosne i Hercegovine dodjeljuje se dr. Jacobu Bergslandu;

c) Priznanje Tuzlanska plaketa u povodu obilježavanja 25. novembra – Dana državnosti Bosne i Hercegovine dodjeljuje se:

- Jasminu Jahiću
- Miroslavu Petroviću
- Vahidu Čamdžiću (posthumno)
- Zoranu Jovanoviću;

d) Priznanje Tuzlanska lenta u povodu obilježavanja 25. novembra – Dana državnosti Bosne i Hercegovine dodjeljuje se:

- Midhatu Džambiću
- Senadu Kadiću
- Stjepanu Lovriću
- Sulejmanu Deliću.

Član 2.

Dodjela javnih priznanja iz prethodnog člana ove Odluke, izvršit će se na svečanoj sjednici Gradskog vijeća Grada Tuzla.

Član 3.

Odluka stupa na snagu danom objavljivanja u „Službenom glasniku Grada Tuzla“, a objavit će se i u sredstvima javnog informisanja i na web stranici Grada Tuzla www.grad.tuzla.ba.

Bosna i Hercegovina
Federacija Bosne i Hercegovine
Tuzlanski kanton
GRAD TUZLA
Gradsko vijeće
Broj:01/04-A-17415-2023
Tuzla, 26. oktobar 2023. godine

PREDSJEDAVAJUĆA

Nataša Perić, prof.

Obrazloženje

Pravni osnov za donošenje Odluke

Pravni osnov za donošenje ove Odluke je član 13. stav 2. alineja 12. Zakona o principima lokalne samouprave („Službene novine Federacije Bosne i Hercegovine“, broj 49/06. i 51/09.), član 25. stav 1. alineja 12. Statuta Grada Tuzla („Službeni glasnik Grada Tuzla“, broj: 6/21.) i član 27. stav 4. Odluke o javnim priznanjima Tuzle („Službeni glasnik Općine Tuzla“, broj: 10/07., 5/08. i 6/09. i „Službeni glasnik Grada Tuzla“, broj: 12/18.).

Odredbom člana 13. stav 2. alineja 12. Zakona o principima lokalne samouprave propisano je da:

“Vijeće u okviru svojih nadležnosti:

-donosi odluke o nagradama i priznanjima jedinica lokalne samouprave”.

Članom 25. stav 1. alineja 12. Statuta Grada Tuzla propisano je sljedeće:

“Gradsko vijeće u okviru svojih nadležnosti:

-donosi odluke o nagradama i priznanjima”.

Članom 27. stav 3. i stav 4. Odluke o javnim priznanjima Tuzle propisano je da:

“Prijedlog odluke o dodjeli javnih priznanja se dostavlja Gradskom vijeću na razmatranje i usvajanje. Gradsko vijeće može prijedlog odluke iz predhodnog stava usvojiti, izmijeniti ili odbiti.”

Procedura koja je predhodila donošenju Odluke

Komisija za odlikovanja i priznanja je dana 12.7.2023. godine u „Večernjem listu“ i na web stranici Grada Tuzla (www.grad.tuzla.ba) objavila Javni konkurs za predlaganje dobitnika javnih priznanja u 2023. godini u povodu obilježavanja sljedećih značajnih datuma iz historije Tuzle i Bosne i Hercegovine: 2. oktobar i 25. novembar.

U povodu objavljenog Javnog konkursa, Komisija za odlikovanja i priznanja Gradskog vijeća Grada Tuzla je održala tri sjednice: 18.8.2023. godine, 26.9.2023. godine i 12.10.2023. godine.

Na sjednici održanoj dana 18.8.2023. godine, a shodno članu 26. Odluke o javnim priznanjima Tuzle („Službeni glasnik Općine Tuzla“, broj: 10/07., 5/08. i 6/09. i „Službeni glasnik Grada Tuzla“, broj: 12/18.) (u daljem tekstu: Odluka), kojim je propisano da „Komisija vrši ocjenu formalne ispravnosti prijedloga sa aspekta pravne legitimacije podnosilaca, sadržaja i roka podnošenja“, Komisija za odlikovanja i priznanja je konstatovala da je na Javni konkurs pristiglo ukupno 20 prijedloga za dodjelu javnih priznanja, koji se odnose na 12 različitih kandidata, od čega je jedan prijedlog formalno neispravan.

Na sjednici održanoj 26.9.2023. godine Komisija za odlikovanja i priznanja je, u skladu sa članom 27. Odluke izvršila vrednovanje i ocjenjivanje svih elmenata u pristiglim prijedlozima, nakon čega je jednoglasno utvrdila prijedlog da se:

- priznanje Povelja Grada Tuzla – pravnim licima u povodu obilježavanja 25. novembra – Dana državnosti Bosne i Hercegovine dodijeli Fondaciji tuzlanske zajednice, uz obrazloženje dato od strane predlagača (Mreža aktivnih zajednica);
- priznanje Počasni građanin Tuzle u povodu obilježavanja 25. novembra – Dana državnosti Bosne i Hercegovine dodijeli dr. Jacobu Bergslandu, uz obrazloženje dato od strane predlagača (Zijah Rifatbegović, vijećnik u Gradskom vijeću Tuzla);
- priznanje Tuzlanska plaketa u povodu obilježavanja 25. novembra – Dana državnosti Bosne i Hercegovine dodijeli: Jasminu Jahiću, uz obrazloženje dato od strane predlagača (Rafting klub „Tuzlak“), Miroslavu Petroviću, uz obrazloženje dato od strane predlagača (Udruženje građana „Kreka“ Tuzla), Vahidu Čamdžiću (posthumno), uz obrazloženje dato od strane predlagača (Gradsko kulturno umjetničko društvo „Bosna“ Tuzla, Klub ritmičke gimnastike Tuzla, JU Osnovna škola „Pasci“, UG Gimnastički klub Tuzla, UG „Patrioti Pasci – Petrovice“ i Mjesna zajednica Gornji Pasci) i Zoranu Jovanoviću, uz obrazloženje dato od strane predlagača (Crveni križ/krst Grada Tuzla, Međunarodni forum solidarnosti – Emmaus, Vijeće Kongresa bošnjačkih intelektualaca, Srpsko

građansko vijeće - Pokret za ravnopravnost BiH, UG za podršku razvoja poljoprivrede/voćarstva i stočarstva „Vis“ Požarnica, Srpsko građansko vijeće - Pokret za ravnopravnost Grada Tuzla, Kantonalni odbor sindikata državnih službenika i namještenika u organima javne uprave i pravosuđu TK i Mjesna zajednica Požarnica).

- priznanje Tuzlanska lenta u povodu obilježavanja 25. novembra – Dana državnosti Bosne i Hercegovine dodijeli: Midhatu Džambiću, uz obrazloženje dato od strane predlagača (Crveni križ/krst Grada Tuzla), Senadu Kadiću, uz obrazloženje dato od strane predlagača (Crveni križ/krst Grada Tuzla), Stjepanu Lovriću, uz obrazloženje dato od strane predlagača (Crveni križ/krst Grada Tuzla) i Sulejmanu Deliću, uz obrazloženje dato od strane predlagača (Crveni križ/krst Grada Tuzla).

Na sjednici održanoj 12.10.2023. godine Komisija za odlikovanja i priznanja je utvrdila tekst prijedloga Odluke o dodjeli javnih priznanja u 2023. godini, i isti je dostavila Gradskom vijeću Tuzla na razmatranje i usvajanje.

Razlozi za donošenje Odluke

Komisija za odlikovanja i priznanja je razmotrila sve pristigle inicijative/prijedloge, koje sadrže biografije predloženih kandidata i opis dostignuća, te se opredijelila za dodjelu sljedećih javnih priznanja:

a) Priznanje Povelja Grada Tuzla – pravnim licima u povodu obilježavanja 25. novembra – Dana državnosti Bosne i Hercegovine dodjeljuje se FONDACIJI TUZLANSKE ZAJEDNICE iz sljedećih razloga:

Nastanak i osnivanje Fondacije tuzlanske zajednice veže se za februar 2003. godine, kada se u Osnovnoj školi Simin Han okupilo 60 građana Tuzle, predstavnika različitih udruženja i institucija, škole, roditelja, mjesne zajednice, privatnih preduzeća i drugih građana, kako bi razgovarali o tome šta bi svi zajedno mogli uraditi da naša lokalna zajednica postane prosperitetna sredina. Nakon ovog početnog sastanka, 18 građana iz Tuzle i Simin Hana se odlučilo potpisati osnivački akt, na osnovu čega je 2.7.2003. godine, zvanično registrovana Fondacija građana Simin Hana. Kasnije, u 2005. godini njen naziv je promijenjen u naziv Fondacija tuzlanske zajednice, koji je zadržan do danas. Od te godine, Fondacija je svoje aktivnosti prenosila prvo na područje grada Tuzla, a kasnije i u ostale dijelove Tuzlanskog kantona.

Inicijalna osnivačka sredstva obezbijedili su osnivači Fondacije: Munira Bekić, Hana Ćatibušić, Mustafa Ćatibušić, Danijel Davidović, Nada Dobnik, Mustafa Halilović, Osman Hasić, Sanela Horozić, Monika Kleck, Marko Kovačević, Čedomir Lukić, Enesa Mujković, Aida Novalić, Selma Pelemiš, Omer Redžić, Aton Salaj, Suad Tanović i Magbula Trle. Mnogi od njih dali su poseban volonterski doprinos tokom renoviranja zgrade Mjesne zajednice Simin Han, poznate kao „Agora“ centar, zatim u organizovanju kulturnih događaja, besplatnih edukacija na različite teme itd.

Veliki doprinos radu i razvoju Fondacije dali su i volonterski članovi Upravnog odbora, a posebno prvi predsjednik prof.dr. Ekrem Jusufović, koji je nakon isteka svog drugog mandata 2011. godine, imenovan kao počasni član Upravnog odbora. Svi članovi Upravnog odbora bili su posvećeni humanisti, dosljedni i reprezentativni predstavnici zajednice,iskusni profesionalci u različitim sferama života. Oni su usvojili i sami poštovali čitav niz politika i pravilnika kojima su postavljeni visoki etički standardi i visoka kultura poslovanja. Svi uposlenici Fondacije bili su posebno posvećeni stvaranju povjerljivog i profesionalnog poslovnog okruženja, u kome će se raditi odgovorno, zakonito, stručno i efikasno, kako bi se svi osjećali zadovoljno, ne samo usposlenici nego i korisnici Fondacije.

Važno je istaći da Fondacija ne bi bila ovo što jeste danas, da nema svoje posvećene i vrijedne volontere, mlade i odrasle članove zajednice, koji su svoje vrijeme, znanje i entuzijazam unijeli u rad građanskih komisija za dodjelu finansijske podrške i tematske radne grupe za rješavanje ključnih pitanja u našim lokalnim zajednicama.

Programi Fondacije, od osnivanja do danas, ohrabivali su građane da odgovorno upravljaju svojim životima i da budu aktivni u razvoju svoje ličnosti i svojih zajednica. Stoga je Fondacija organizirala čitav niz edukativnih programa za odrasle, djecu i mlade, koji su imali za cilj da se ojačaju kapaciteti i vještine pojedinaca za aktivno uključivanje u društveni i ekonomski život zajednice. U skladu s tim, redovno je organizovala treninge za organizatore zajednice, treninge za mlade kroz program

„Omladinska banka“, treninge za poduzetnike i slično. Dodatno je pružala organizacionu, konsultantsku i finansijsku podršku udruženjima i aktivnim građanskim grupama, organizacijama i inicijativama u Tuzli i Tuzlanskom kantonu, kako bi mogli lakše realizovati projekte za dobrobit lokalnih zajednica u kojima žive. Od dana svog osnivanja do kraja 2022. godine, distribuirala je preko 2000 malih grantova u vrijednosti većoj od 5,5 miliona KM, koje je implementiralo preko 53 hiljade građana, dok je korist od sufinansiranih projekata imalo više od 150 hiljada ljudi u Tuzlanskom kantonu.

Fondacija je od 2008. godine aktivna u promociji filantropije, kada je organizirala prve kampanje za prikupljanje sredstava od pojedinaca i preduzeća, kako bi se što više projekata za dobrobit zajednice podržalo iz domaćih sredstava. Fondacija je ostvarila veliki broj saradnji sa domaćim filantropima u zemlji i inostranstvu. Već nekoliko godina unazad, izgradila je respektabilan krug donatora Fondacije koji rado koriste njene resurse kako bi ostvarili svoje filantropske želje kroz podršku lokalnim projektima. Od svog osnivanja do danas Fondacija je kroz svoje programe podrške godišnje uspjela okupiti stotine filantropa. Od osnivanje platforme za online doniranje www.doniraj.ba povjerenje Fondaciji i inicijativama za opšte dobro koje na ovoj platformi implementiraju građani svake godine daje više od 400 donatora pojedinaca i više od 50 donatora preduzeća.

Tokom svih proteklih godina, Fondacija je gradila partnerske odnose sa lokalnim i kantonalnim vlastima, sve u cilju rješavanja prioriternih problema u zajednici i uspostavljanja kvalitetne saradnje između javnog i civilnog sektora. Na dvadesetogodišnjicu svog djelovanja Fondacija je započela izgradnju Centra za demokratiju i aktivno građanstvo, kako bi kao resursna organizacija što bolje odgovorila na potrebe organizacija civilnog društva i građana. Centar, kao kruna dvodecenijskog predanog rada, ujedno će biti dom Fondaciji tuzlanske zajednice i svim ljudima koji društvenim inovacijama žele doprinijeti održivom, ekološkom i inkluzivnom razvoju našeg društva.

b) Priznanje Počasni građanin Tuzle u povodu obilježavanja 25. novembra – Dana državnosti Bosne i Hercegovine dodjeljuje se dr. JACOBU BERGSLANDU iz sljedećih razloga:

Doktor Jacob Bergsland rođen je u San Francisku, Sjedinjene Američke Države. Odrastao je u Norveškoj, gdje je završio školu u gradu Notodden, Telemark. Medicinski fakultet je završio na univerzitetu u Oslu, te nakon dvije godine rada u Norveškoj i Švedskoj preselio je u Sjedinjene Američke Države, gdje je specijalizirao kardio-torakalnu hirurgiju 1983. godine. Dobio je posao u bolnici Buffalo Veterans Administration, Generalnoj bolnici Buffalo i državnom univerzitetu New York.

Godine 1983. zajedno sa svojim starijim kolegama pomogao je u osnivanju kardio transplant programa u zapadnom New York-u. Nastavio je da radi u oblasti kardiohirurgije i transplantacije kod odraslih do 2001. godine. Pokrenuo je i postao šef Centra za manje invazivnu kardiohirurgiju u generalnoj bolnici Buffalo 1996. godine, te napravio od generalne bolnice Buffalo međunarodnog lidera u operacijama na otvorenom srcu. Objavio je brojne naučne radove na ovu i druge medicinske i hirurške teme.

Gledajući grozote koje su se dešavale u Bosni i Hercegovini ranih 90-ih godina, odlučio je da pokuša lično pomoći i volontirao je za medicinski korpus UNPROFOR-a kao norveški doktor medicine 1994. godine, te je četiri mjeseca proveo u terenskoj bolnici pod nazivom „Plava bolnica“ u Tuzli. Tokom četiri mjeseca službe, upoznao se sa medicinskim osobljem UKC-a Tuzla, koji su konstantno radili na spašavanju života svojih sunarodnjaka. Impresionirala ga je posvećenost Bosanaca i Hercegovaca da se bore za nezavisnost, multikulturalnu državu protiv moćnog nacionalističkog agresora. Doktor Bergsland je učestvovao u aktivnostima tuzlanskog kliničkog centra i svjedočio improviziranoj, ali efektivnoj organizaciji ratnih bolnica u Čeliću i Kalesiji.

Kvalitet medicinskog osoblja UKC-a Tuzla naveo je doktora Bergslanda da se posveti pružanju pomoći Tuzli i bosanskohercegovačkom sistemu zdravstvene zaštite, te da pokrene napredni kardio program nakon rata. Program je počeo odmah, dok je rat još bio u toku, te zajedno sa kolegama iz Buffala, prikupio je sredstva za program razmjene između Tuzle i Buffala. Doktori i medicinske sestre iz UKC Tuzla su odlazili u Buffalo na obuku iz kardiologije, kardiohirurgije i intenzivne kardio njege. Program se dodatno proširio kada su doktor Bergsland i uprava generalne bolnice Buffalo dobili grant u vrijednosti 2 miliona dolara od Clintonove administracije. Program su inicirali u Bijeloj kući Hilary Clinton i Madeleine Albright, a prisustvovao je i tadašnji gradonačelnik Tuzle, Selim Bešliagić te

menadžment i osoblje iz UKC Tuzla, generalne bolnice Buffalo, kao i uposlenici i predstavnici BiH ministarstva za rad i USAID-a.

Program se proširio i na neurologiju, neurohirurgiju, te druge specijalnosti. Mnogi predani pojedinci su učestvovali u programu, ali dr. Muharem Merić nikada neće biti zaboravljen kao izvrstan ljekar koji je nažalost preminuo 2005. godine. Specijalisti i bolnička uprava iz generalne bolnice Buffalo su došli da podučavaju i pruže usluge UKC-u Tuzla, uključujući i obuku iz engleskog jezika, pod vođstvom Buffalo instituta za engleski jezik. Oko 50 uposlenika iz UKC-a Tuzla je posjetilo Buffalo radi napredne obuke. USAID je također obezbijedio dodatnih 2 miliona dolara za popravku i doradu intenzivne njege UKC-a Tuzla, koja je bila ozbiljno oštećena tokom granatiranja od strane agresora. 2008. godine doktor Bergsland je bio jedan od vodećih ljekara koji su osnovali BiH Centar za srce, javno-privatno partnerstvo, kojeg su finansirali lokalni investitori i banke, te IFC odjeljenje Svjetske banke. To je postao centar napredne kardio intervencije i hirurgije, i opsluživao je cijelu BiH. Centar i dalje radi sa svojim kardio programom, te se proširio i na druge specijalnosti, nakon što ga je preuzeo novi vlasnik 2018. godine.

Doktor Bergsland se 2001. godine doselio za stalno u BiH i Norvešku iz SAD-a. Specijalistička edukacija bolničkog osoblja iz Tuzle je nastavljena u nacionalnoj bolnici u Norveškoj sa fokusom na naprednu kardio njegu, uključujući prvi BiH program kardio elektrofiziologije. Vodeći bolnički uposlenici iz Norveške su došli u Tuzlu, te donijeli esencijalnu medicinsku opremu.

Doktor Bergsland je bio ključni akter u osnivanju BIT centra, kojeg su finansirali Norveška i Grad Tuzla. BIT centar je postao bitan centar za nove kompanije u Tuzli, koji je kreirao nove tehnologije i otvorio mnoga radna mjesta za mlade Bosance i Hercegovce.

2015. godine doktor Bergsland je osnovao norveško-američku kompaniju koja razvija novi metod liječenja bolesti mitralne valvule. Ovaj aparat će uskoro biti spreman za testiranje na pacijentima, a kliničke studije će početi nešto kasnije ove godine u SAD. Kompanija zapošljava ljude u Norveškoj, Švedskoj, Italiji i SAD, a investirala je preko 20 miliona dolara u razvoj novih tehnologija.

Doktor Bergsland je imenovan „građaninom godine“ u Buffalo i počasnim profesorom Univerziteta u Tuzli. Priznati je akademik u Sarajevu, te je dobio i počasnu nagradu Republike Hrvatske, koju mu je dodijelio tadašnji predsjednik Stjepan Mesić.

Nakon što je bio odsutan tokom pandemije, doktor Bergsland se vratio u Tuzlu u potrazi za poslovnim i akademskim interesima. Nedavno je osnovao kompaniju u BIT centru, te je i dalje stanovnik Tuzle.

c) Priznanje Tuzlanska plaketa u povodu obilježavanja 25. novembra – Dana državnosti Bosne i Hercegovine dodjeljuje se JASMINU JAHIĆU iz sljedećih razloga:

Jasmin Jahić – Jasko rođen je 1972. godine u Tuzli, gdje i danas živi. U Tuzli je završio i Srednju rudarsku školu. Oženjen je i otac dvoje djece.

Bio je pripadnik Armije Republike Bosne i Hercegovine od 1993. godine, a iz oružanih snaga demobilisan je 1997. godine.

U Profesionalnoj vatrogasnoj jedinici Tuzla je zaposlen od 1999. godine, a trenutno vrši dužnost komandira smjene sa 16 ljudi. Sa svojom jedinicom naročito se ističe u gašenju velikog šumskog požara na Husinu 2020. godine, kao i u gašenju požara u COVID bolnici UKC Tuzla, u kome je nažalost bilo i žrtava. Tokom redovnog vršenja službe, učestvuje u stotinama akcija gašenja požara i spašavanja života i imovine u prirodnim nepogodama i nesrećama.

Osim profesionalnog angažmana, Jasmin Jahić je i pripadnik Gorske službe spašavanja Zavidovići od 2014. godine. Tu je prošao potrebne obuke i certifikovan je za gorska spašavanja, kao i za spašavanja na vodi i iz vode. Posjeduje i EU CMI certifikat, koji se smatra najprestižnijim certifikatom u oblasti spašavanja ljudi i imovine. Učestvovao je u mnogim akcijama spašavanja, kao i u četiri slučaja potrage za utopljenicima. U vrijeme velikih poplava 2014. godine učestvuje u akcijama pomoći i spašavanja u potopljenim područjima Domaljevca, Babine Grede i Brčkog. Od osnivanja Stanice Gorske službe spašavanja Tuzla 2021. godine aktivno se uključuje u njen rad i učestvuje u brojnim potragama i akcijama spašavanja.

Nakon katastrofalnog zemljotresa u Turskoj, 02.02.2023. godine među prvima se, kao jedini certifikovani spasilac iz Tuzle, dobrovoljno priključuje interventnoj jedinici koja je upućena u Tursku. Nakon obavljenog teškog zadatka u Tuzlu se vraća 19.02.2023. godine. Za ovaj podvig od svojih kolega dobija priznanje i sat. Dobitnik je Zlatnika Grada Sarajeva kojim ga je odlikovala Benjamin

Karić, gradonačelnica Grada Sarajeva. Također je dobitnik dva Srebrenjaka i priznanja Federacije Bosne i Hercegovine za izuzetan doprinos i hrabrost. Zbog velike medijske pažnje, Jasmin Jahić i njegove kolege su snažno doprinijeli afirmaciji Tuzle i Bosne i Hercegovine.

Višestruki je dobrovoljni darivalac krvi.

Raftingom se bavi od 2004. godine, te je kao član Rafting kluba „Vatrogasac“ učestvovao na rafting regatama i takmičenjima širom regiona, stičući divna životna prijateljstva i promovišući Tuzlu i Tuzlanski kanton.

Priznanje Tuzlanska plaketa u povodu obilježavanja 25. novembra – Dana državnosti Bosne i Hercegovine dodjeljuje se MIROSLAVU PETROVIĆU iz sljedećih razloga:

Miroslav Petrović rođen je 12. septembra 1946. godine u Tuzli. U novinarstvu i publicistici, te u svim sferama društvenog djelovanja Tuzle, a posebno naselja Kreka, prisutan je više od 60 godina. Iako u poznim godinama i narušenog zdravlja, i dalje je veoma aktivan u vrlo odgovornoj i teškoj profesiji.

Tokom novinarske karijere u brojnim medijima bivše države i Bosne i Hercegovine objavio je desetine hiljada članaka svih novinarskih žanrova i po tome spada među najproduktivnije u historiji novinarstva Tuzle i Bosne i Hercegovine.

Tokom karijere, kao urednik raznih medija, osposobio je veliki broj mladih novinara, danas uglednih dopisnika, urednika i vlasnika raznih medija.

Bio je dopisnik najvećih jugoslovenskih listova prije rata („Sportske novosti“, „Vijesnik“ i „Večernji list“ Zagreb, „Politika ekspres“ i „Borba“ Beograd, „Večernje novine“ i „Jutarnje novine“ Sarajevo Tanjug, FENA, zatim magazini „Svijet“, „Start“, „Arena“ i drugi). Bio je ratni dopisnik „Večernjih novina“ iz zone 2. korpusa Armije RBiH.

Kao dobrovoljac, bio je pripadnik Armije RBiH, počev od 7. maja 1992. godine do kraja rata, te još kao starješina, s činom natporučnika do oktobra 1997. godine U 2. korpusu Armije RBiH obnašao je dužnost zamjenika načelnika informativne službe. Pohvaljivan je za svoj angažman i odanost u odbrani nezavisne i slobodne Bosne i Hercegovine.

Obnašao je brojne odgovorne dužnosti u novinarstvu, ali i drugim oblastima društvenog djelovanja, posebno u sportu, kako kao aktivni sportista, tako i kao član rukovodnih tijela brojnih klubova (FK Sloboda, KK Sloboda Dita, RK Sloboda, STK „Kreka“). U periodu od 2003. do 2007. godine obnašao je dužnost predsjednika Sekcije sportskih novinara BiH pri udruženju BH novinari. Trenutno je član Društva novinara BiH i Hrvatskog zbora sportskih novinara.

Dao je veliki doprinos afirmaciji i zaštiti ljudskih prava, demokratije, slobode govora, zaštite okoline, sporta, te posebno afirmaciji tradicija zajedničkog nacionalnog i kulturnog življenja i međusobnog uvažavanja u naselju Kreka, gdje je odrastao, školovao se i radio.

Za novinarski, publicistički i općenito društveni angažman dobitnik je više priznanja – plaketa, nagrada, diploma, zahvalnica i povelja. Dobitnik je, prije rata dvije novinske nagrade – Udruženja novinara BiH i Udruženja novinara fabričke štampe. Dobitnik je i brojnih priznanja, među kojima Plakete „RSD Sloboda“, Zlatne plakete SOUR-a „Igmin“, Srebrene značke MOI BiH, Plakete Udruženja klubova A-1 košarkaške lige FBiH, Plakete i Zahvalnice OŽRK „Jedinstvo“ Tuzla, Priznanja Sportskog saveza općine Tuzla, Zahvalnice Univerziteta u Tuzli, Zahvalnice UKC Tuzla, Srebrene diplome Udruženja novinara BiH, Plakete i Zahvalnice organizacionih odbora RSI „Bratstvo-jedinstvo“ hemičara Jugoslavije, Zahvalnice Organizacionog komiteta XIV ZOI „Sarajevo 1984“ i mnogih drugih. Magazin „BH Tempo 09“ proglasio ga je 2009. godine sportskim novinarom Tuzlanske regije.

U sferi publicistike, autor ili koautor je brojnih vrijednih izdanja kao što su „Monografija 100 godina Rudnika Kreka“, monografije „70 godina RSD Sloboda“ i „RSD Sloboda 90 godina“ (urednik izdanja i autor), koautor knjige „Poker asova“ o legendama tuzlanskog fudbala (separat o Dževadu Šećerbegoviću), saradnik u monografiji „100 godina kakanjskog Rudara“, urednik tri publikacije „Naša Kreka“ (za 20, 30 i 35 godina Susreta Krečana), časopisa „Sportski žurnal“ Sportskog saveza općine Tuzla, te drugih publikacija i biltena.

Miroslav Petrović je jedan od osnivača Udruženja građana „Kreka“, te jedan od utemeljitelja nadaleko poznatih Susreta Krečana, manifestacije koja po svom značaju u njegovanju suživota i različitih nacionalnih, kulturnih i drugih vrijednosti predstavlja izuzetnu vrijednost koja nadmašuje lokalne okvire. Svjedočenja o ovim susretima kroz uredničku i novinarsku vizuru Miroslava Petrovića

sadržana su i u tri vrijedne publikacije pod zajedničkim nazivom „Naša Kreka“, u kojima je pohranjena bogata arhiva ličnosti, objekata i događaja od značaja za razvoj naselja Kreka, rudnika i Solane, kao i Tuzle općenito.

Također, Miroslav Petrović je osnivač i urednik stranice „Krečani“ (Facebook), koja je pokrenuta 2011. godine i do danas ima više od 1500 stalnih posjetilaca iz cijelog svijeta. Stranica predstavlja bogatu foto i rukopisnu arhivu vezanu za nastanak, razvoj, te život u naselju Kreka od njegovog osnivanja do danas. Jedan je od osnivača portala „Tuzla LIVE“, gdje obavlja poslove izvršnog urednika od osnivanja 2006. godine do danas.

Priznanje Tuzlanska plaketa u povodu obilježavanja 25. novembra – Dana državnosti Bosne i Hercegovine dodjeljuje se VAHIDU ČAMDŽIĆU (posthumno) iz sljedećih razloga:

Vahid Čamdžić je završio obrazovanje u Tuzli i Sarajevu, te se zaposlio u Javnoj ustanovi Osnovna škola „Pasci Gornji“, gdje je od 1973. godine, pa sve do odlaska u penziju radio kao nastavnik tjelesnog i zdravstvenog odgoja, te jedno vrijeme obnašao i funkciju direktora škole. Za svoj dugogodišnji rad izveo je niz generacija velikih sportaša, a svojim principijelnim pedagoškim radom mnogim generacijama osnovaca ugradio je temelje dobrog odgoja i vaspitanja, osposobljavajući ih za budući život, sa posebnim akcentom na očuvanju kulturne baštine svih naših naroda koji žive na prostorima Bosne i Hercegovine.

U toku radnog vijeka isticao se na mnogim poljima, na kojima je postizao i zapažene rezultate. Bio je zaljubljenik u folklor i tradiciju naših naroda. Ostavio je neizbrisiv trag kao dugogodišnji član i umjetnički rukovodilac folklorne sekcije RKUD „Mitar Trifunović Učo“, kasnije GKUD „Bosna“ s kojima je čuvao tradiciju i običaje naših naroda i dao ogroman doprinos promociji kulturnog naslijeđa Grada Tuzla, Bosne i Hercegovine i bivše države Jugoslavije. Svojom agilnošću, požrtvovanošću i idejama pronio je slavu ovog društva širom svijeta. Njegovi folkloristi su učestvovali na brojnim međunarodnim takmičenjima gdje su na najljepši način predstavljali kulturu i tradiciju našeg naroda. U periodu od 1980. pa do 2000. godine društvo dostiže svoj najveći prosperitet, prezentujući Grad Tuzlu i državu BiH. U tom periodu gradi se i posebna sala za folklor kao jedinstveni objekat u široj regiji.

Godine 1987. vodi društvo u Sjedinjene Američke Države, kao predstavnik kulturne baštine ispred bivše države Jugoslavije. Tom prilikom iskazane su sve pohvale od strane organizatora za vrhunsko vodstvo društva na čijem čelu je bio Vahid Čamdžić. O navedenom učešću u Sjedinjenim Američkim Državama govore i pisma Ambasadora SFRJ i koznula u Čikagu Bahrudina Bijedića. Zahvaljujući Vahidu Čamdžiću, te istrajnom radu cijelog društva, a u sklopu 40 godina rada, društvo je dobilo prestižno priznanje „Orden Republike sa srebrenim vijencem“ od strane aktuelnog Predsjedništva BiH 1996. godine.

Dao je ogroman doprinos razvoju sporta i kulture na području dvije mjesne zajednice Pasci Gornji i Par Selo obavljajući volonterski dužnost trenera FK Pasci Gornji, a kasnije u KUD „Osman Hurić“ Pasci Gornji, gdje je dugi niz godina obavljao dužnost rukovodioca folklorne sekcije i stvorio zlatnu generaciju folklorista koja je pod njegovim vodstvom osvojila značajna priznanja i nagrade na području tada opštine Tuzla, kao i mnogo šire po cijeloj Bosni i Hercegovini. Uz njegovu pomoć nabavljena je u to vrijeme respektabilna količina opreme za folklor koja se koristi i danas.

Vahid Čamdžić bio je dugogodišnji član Društva za tjelesno vaspitanje Partizan Tuzla (DTV Partizan Tuzla). Svojim aktivnim djelovanjem kao sportista, a kasije kao prednjak (trener) vodio je mnoge generacije tuzlanskih gimnastičara i gimnastičarki na domaćim i međunarodnim takmičenjima. Zahvaljujući svom predanom volonterskom radu sa tadašnjim generacijama, gimnastički sport je bio na visokoj razini, kako u Bosni i Hercegovini, tako i u cijeloj SFRJ tokom šezdesetih i sedamdesetih godina 20. stoljeća. Svojim radom u DTV „Partizan“ Tuzla koji je simbol sporta i kulture ovog prostora dao je iznimno veliki doprinos. U ovom objektu zahvaljujući Vahidu Čamdžiću stasali su mnogi vrhunski sportisti, ali i kulturne ličnosti grada. Svojim djelovanjem značajno je uticao na identitet cijele Tuzle, posebno kroz zajedništvo i ljudsku toleranciju, razumijevanje, saradnju, suživot itd.

Zahvaljujući Vahidu Čamdžiću, čovjeku koji nije odustao od gimnastike, folkloru, rada s novim generacijama, bez obzira na sve teškoće sa kojima se susretao, danas u Tuzli uspješno egzistira više

klubova i škola gimnastike, folkloru i plesa, te naredne generacije imaju mogućnost da se bave ovim najljepšim sportovima.

Vahid Čamdžić preminuo je 13.01.2022. godine u Tuzli.

Priznanje Tuzlanska plaketa u povodu obilježavanja 25. novembra – Dana državnosti Bosne i Hercegovine dodjeljuje se ZORANU JOVANOVIĆU iz sljedećih razloga:

Zoran Jovanović, sin Teše, rođen je 19.07.1959. godine u Tuzli, gdje je završio osnovnu i srednju školu – gimnaziju. Po zanimanju je diplomirani pravnik. Od 1983. godine do 2011. godine zaposlen je u Općinskom sudu Tuzla. Od 2008. godine do 2010. godine bio je vijećnik u Općinskom vijeću Tuzla, a od 2010. do 2014. godine poslanik u Skupštini TK i delegat u Domu naroda Parlamentarne skupštine Federacije BiH. U istom mandatu bio je predsjednik Komisije za ustavna pitanja i član Zakonodavno-pravne komisije Skupštine TK, te predsjednik Ustavne komisije Doma naroda Parlamentarne skupštine Federacije BiH i član Komisije za reviziju izvještaja institucija vlasti Federacije BiH. U periodu 2017. – 2018. godina bio je ministar u Ministarstvu za rad, socijalnu politiku i povratak TK, a od 2019. do 2021. godine obavljao je dužnost direktora Kantonalne uprave civilne zaštite TK. Trenutno obavlja dužnost v.d. direktora Kantonalne uprave civilne zaštite TK.

Kao pripadnik Armije RBiH od 1993. do 1996. godine aktivno je učestovao u odbrani tuzlanske regije i Bosne i Hercegovine, te je više puta pohvaljivan od strane nadležnih komandnih struktura.

Od 1993. godine, tj. od samog osnivanja Srpskog građanskog vijeća – Pokret za ravnopravnost - SGV PR stupio je u članstvo ovog udruženja. SGV PR je svo vrijeme promoviralo istinu o agresiji na BiH, poduzimalo napore u zaustavljanju rata, zalagalo se za očuvanje BiH u međunarodno priznatim granicama, međunacionalnu i etničku toleranciju, suživot i očuvanje demokratije. SGV PR je i dobitnik alternativne Nobelove nagrade za mir u Štokholmu 1995. godine, a za šta je dijelom, zbog svog nesebičnog angažovanja zaslužan i Zoran Jovanović.

Izabran za delegata 1. skupštine SGV PR BiH koja je održana 1994. godine u opkoljenom Sarajevu i na koju su delegati iz Tuzle uspjeli doći uz nadljudske napore i velike opasnosti zbog rata, rizikujući i vlastite živote a radi upoznavanja svjetske javnosti o istini i ratu u BiH i radi borbe za očuvanje cjelovite, demokratske i građanske države ravnopravnih građana i naroda. Bio je delegat i 2. skupštine SGV PR također održane u Sarajevu 1995. godine. Po prestanku ratnih dejstava u BiH ostaje i dalje član SGV PR te biva izabran za rukovodioca Biroa za pružanje pravne pomoći u okviru SGV PR TK. 1998. godine Zoran Jovanović je u organizaciji SGV PR TK bio na čelu kolone izbjeglih i raseljenih građana Bošnjaka, prilikom njihove prve posjete prijeratnim mjestima življenja i to u sela Trnova, Janjari i Atmačići u općini Ugljevik, a zatim i u mjesto Janja i Bijeljina čime je razbijen strah od posjeta i prelaska entitetskih granica.

Za svoj rad i nemjerljiv doprinos u afirmaciji tuzlanskog modela življenja svih sa svima, afirmaciji BiH kao demokratske države ravnopravnih građana i naroda koji u njoj žive, u afirmaciji procesa održivog povratka, afirmaciji i radu na očuvanju demokratije i zaštite osnovnih ljudskih prava i građanskih sloboda garantovanih Ustavom BiH, imenovan je u dva mandata bio član UO SGV PR BiH, a zatim je 2006. izabran za predsjednika SGV PR TK, 2010. godine izabran je za potpredsjednika SGV PR BiH, a 2018. godine izabran je za predsjednika SGV PR BiH, i tu dužnost i danas obavlja.

Posebno treba istaći njegov lični, a svakako i institucionalni angažman prilikom procesa povratka u tuzlanskom regionu. Nakon teških ratnih sukoba uspio je učiniti ono što je izgledalo nemoguće – pokrenuti i ohrabriti povratak ljudi na svoja prijeratna prebivališta. Ne samo Srba, već i Bošnjaka, Hrvata i svih drugih povratnika. U vrijeme dok je obnašao funkciju ministra za rad, socijalnu politiku i povratak TK realizovano je i implementirano niz projekata usmjerenih na pružanje pomoći i asistenciji povratničkoj populaciji u stanju potrebe, gdje je važno istaći da je mnoštvo građana Grada Tuzle i Tuzlanskog kantona obuhvaćeno ovakvim projektima, te su im obezbjeđeni prehrambeni paketi, ogrijev, bijela tehnika i osnovno pokućanstvo, funkcionalni plastenici, sitna i krupna stoka, a sve navedeno je osiguralo egzistencijalnu održivost navedene kategorije stanovništva.

Osim navedenog, obnašajući funkciju ministra za rad, socijalnu politiku i povratak TK, postavio je temelje institucionalnog rješavanja pitanja socijalnog zbrinjavanja korisnika u stanju potrebe, koji su bili oslonac da se ne samo zadrži kvalitet pruženih usluga korisnicima Prihvatnog centra „Duje“ gdje je smješteno preko 450 korisnika, od kojih je njih preko 300 sa područja TK, već da se konstantno

stvaraju uslovi za poboljšanje kvaliteta usluga, a samim time stvaraju se uslovi za održavanje zadovoljstva smještenih korisnika.

Zoran Jovanović je po završetku rata u BiH dao veliki doprinos u razvoju Mjesne zajednice Požarnica, posebno imajući u vidu da se radi o mjesnoj zajednici koja je bila u ratnoj zoni. U dogovoru sa inženjerskom jedinicom II korpusa Armije R BiH 1998. godine uspjeva da se izvrši rekonstrukcija makadmskih puteva na području Mjesne zajednice Požarnica što je bio jedan od preduslova za povratak stanovnika na ovo područje. Nakon toga aktivno radi na iznalaženju rješenja za obnovu električne mreže na ovom području i obraća se mnogim donatorima, te preko USAID-a uspjeva da se pristupi rekonstrukciji elektro mreže. Putem finskog CIMIC-a uspio je obezbijediti donaciju za sanaciju vodovoda na ovom području, a putem projekta prema UNDP-u obezbijedio je sredstva za sufinansiranje ulične rasvjete od Mjesne zajednice Simin Han do škole u Požarnici u dužini od oko 2400 metara.

Zoran Jovanović je 2005. godine pokrenuo aktivnosti na osnivanju UG „Vis“ za razvoj poljoprivrede, stočarstva i voćarstva sa sjedištem u Požarnici. Navedeno udruženje je, uz pomoć Zorana Jovanovića, koji je bio i prvi predsjednik udruženja do 2008. godine, i uz pomoć Grada Tuzla, postiglo zavidne rezultate u razvoju stočarstva, proizvodnji mlijeka i organizovanom otkupu mlijeka, te je zahvaljujući toj činjenici na ovoj mjesnoj zajednici u saradnji sa Gradom Tuzla otvorena i otkupna stanica mlijeka. Zahvaljujući navedenim aktivnostima došlo je do poboljšanja uslova života građana ove mjesne zajednice.

U dva mandata bio je glavni povjerenik Mjesne zajednice Požarnica, a trenutno obavlja dužnost predsjednika Savjeta Mjesne zajednice Požarnica, te je u 2022. godini na osnovu projekata zajedno sa Gradom Tuzla uspio obezbijediti oko 100 hiljada KM iz Budžeta Tuzlanskog kantona, koja su i realizovana.

Od 1996. godine aktivni je član Sindikata državnih službenika i namještenika u Federaciji BiH, prvo kao podpredsjednik Sindikalne organizacije Općinskog suda u Tuzli, a od 1998. kao predsjednik Sindikalne organizacije Općinskog suda u Tuzli. Za vrlo kratko vrijeme izabran je za predsjednika Kantonalnog odbora sindikata državnih službenika TK, a 2012. godine, kao rezultat poštovanog rada u afirmaciji i zaštiti radničkih prava i razvoja sindikata, izabran je za dopredsjednika Sindikata državnih službenika i namještenika u Federaciji BiH, te tu dužnost obavlja do 2017. godine.

Za vrijeme dok je obnašao funkciju direktora, Kantonalna uprava civilne zaštite TK, na najbolji mogući način odgovorila je izazovu koji je postavila pandemija COVID-19 virusa. Sama organizacija djelovanja u kriznim situacijama i mobilizacija resursa dovela je do toga da Kantonalna uprava civilne zaštite TK ima zavidne, ako ne i najbolje rezultate na teritoriji cijele države BiH u pomenutom periodu. Poštujući zakonske ovlasti, u režiji Kantonalne uprave civilne zaštite TK, u rekordnom vremenu su nabavljeni prvi testovi na COVID-19 za potrebe UKC Tuzla, sve ključne službe opskrbljene su potrebnom količinom zaštitnih maski, formiran je i organizovan karantin u prostorijama Hotela „Tuzla“ gdje je obezbijeđen smještaj na bazi jednokrevetnih soba uz stalni medicinski i drugi stručni nadzor sa cjelokupnom logističkom podrškom, a svim smještenim je obezbijeđena ishrana u vidu tri obroka dnevno.

Zoran Jovanović je ličnim angažmanom, strukom i iskustvom dao nemjerljiv doprinos da se uobličiti projekat Principi za izmjene Ustava, a potom i organiziranja i okupljanja oko Deklaracije o ustavnim i drugim reformama BiH na putu u EU i NATO oko koje se okupilo preko 45 organizacija kojima gravitira preko 450 hiljada građana Bosne i Hercegovine. Zoran Jovanović je u ličnom kapacitetu na više od 50 javnih tribina promovirao stavove o nužnoj ustavnoj i izbornoj reformi u BiH, koja treba biti uređena kao država punih ljudskih prava i sloboda na cijelom njenom teritoriju. Njegove aktivnosti stavljaju ga u vrh aktivista – boraca za ljudska prava i slobodu, demokratske principe i interkulturalni dijalog u bosanskohercegovačkom društvu.

Dugogodišnji je član i saradnik Crvenog križa u Tuzli. Nebrojeno je konkretnih primjera u kojima je Zoran Jovanović bio pokretač da se njegovim sugrađanima od strane Crvenog Križa Grada Tuzle pruži odgovarajuća pomoć. Darovao krv nekoliko puta i tim činom se upisao na listu humanista.

d) Priznanje Tuzlanska lenta u povodu obilježavanja 25. novembra – Dana državnosti Bosne i Hercegovine dodjeljuje se MIDHATU DŽAMBIĆU iz sljedećih razloga:

Midhat Džambić rođen je 10.10.1965. godine u Tuzli. Dobrovoljni je i višestruki davalac krvi. Krv je darovao više od 100 puta, te je na taj način spasio živote velikog broja ljudi ili je pomogao u njihovom izlječenju i ozdravljenju.

Priznanje Tuzlanska lenta u povodu obilježavanja 25. novembra – Dana državnosti Bosne i Hercegovine dodjeljuje se SENADU KADIĆU iz sljedećih razloga:

Senad Kadić rođen je 18.7.1961. godine u Tuzli. Dobrovoljni je i višestruki davalac krvi. Krv je darovao više od 100 puta, te je na taj način spasio živote velikog broja ljudi ili je pomogao u njihovom izlječenju i ozdravljenju.

Priznanje Tuzlanska lenta u povodu obilježavanja 25. novembra – Dana državnosti Bosne i Hercegovine dodjeljuje se STJEPANU LOVRIĆU iz sljedećih razloga:

Stjepan Lovrić rođen je 12.8.1967. godine u Tuzli. Dobrovoljni je i višestruki davalac krvi. Krv je darovao više od 100 puta, te je na taj način spasio živote velikog broja ljudi ili je pomogao u njihovom izlječenju i ozdravljenju.

Priznanje Tuzlanska lenta u povodu obilježavanja 25. novembra – Dana državnosti Bosne i Hercegovine dodjeljuje se SULEJMANU DELIĆU iz sljedećih razloga:

Sulejman Delić rođen je 14.6.1958. godine u Tuzli. Dobrovoljni je i višestruki davalac krvi. Krv je darovao više od 100 puta, te je na taj način spasio živote velikog broja ljudi ili je pomogao u njihovom izlječenju i ozdravljenju.

PREDLAGAČ

Komisija za odlikovanja i priznanja

OBRADIVAČ

Stručna služba Gradskog vijeća